

# Latih anak-anak yatim berdikari

BN 19 FEB 1994

KUALA LUMPUR, Jumaat — Datuk Seri Dr Mahathir Mohamad mahu anak-anak yatim dibimbing supaya dapat berdikari serta mempunyai sikap bersaing demi masa depan mereka dan masyarakat.

Anak-anak yatim, kata Perdana Menteri, tidak harus dibiarkan bergantung sangat kepada bantuan seumur hidup sehingga mereka menjadi beban kepada masyarakat.

Sehubungan dengan

itu, katanya, pengasuh atau pertubuhan yang menjaga kebajikan anak-anak yatim tidak harus memanjakan sangat golongan itu.

"Bantuan kepada anak yatim adalah wajar dalam bentuk latihan dan pembentukan sikap supaya dapat bersaing dengan orang lain mengikut kemampuan dan kemahiran sendiri.

"Anak yatim tidak ada sebarang keistimewaan. Mereka sama seperti anak lain yang ada ibu bapa.

"Oleh itu, menjadi tanggungjawab masyarakat memelihara mereka," katanya ketika berucap melancarkan Yayasan Kebajikan Anak-anak Yatim Malaysia (Yatim) di Pusat Islam, hari ini.

Sejurus selepas Yatim dilancarkan, Dr Mahathir yang juga penaung yayasan itu, menerima sumbangan RM11.5 juta daripada dermawan termasuk korporat, bank dan individu.

Antara sumbangan itu ialah RM1 juta masing-

masing daripada Remang Berhad; Yayasan Saad; Kumpulan Syarikat Berjaya; Multi Purpose Holding Berhad; G-Team Consultant serta Advance Synergy.

Sumbangan daripada individu pula ialah Tun Daim Zainuddin RM2 juta manakala RM1 juta masing-masing daripada Isa Ismail; Tan Sri Vincent Tan dan Datuk Nik Ibrahim Nik Kamil.

Dr Mahathir bersyukur dan berbangga dengan sikap syarikat besar dan

usahawan yang berjaya kerana tidak melupakan tanggungjawab menghulurkan bantuan kepada golongan kurang bernasib baik.

Sementara itu, Pengerusi Lembaga Pemegang Amanah Yatim, Datuk Ahmad Sebi Abu Bakar, berkata sumbangan itu akan digunakan untuk membiayai anak-anak yatim yang cerdas dan berpotensi maju mendapat latihan atau meneruskan pengajian ke peringkat tertinggi.